

召廣澤王允燿懷恩王允燿至京廢為庶人

甲午 皇三女封安成公主

乙未復荆府中護衛隸遠府政宣府護衛為長沙護衛仍隸谷府

丁酉左軍都督僉事何濬坐不宿衛免官調寧夏

己酉曉刻火星入邸宿

庚子都指揮使梁銘為後軍都督僉事

襲涼州命罪守將都指揮丁斌怯敵之罪

辛丑河南布政司左叅議杜驥按察僉事吳彛都指揮僉事

劉珪以大水移家避入周邸俱戍興州

夜大星赤光自文昌流紫微西藩外

壬寅詔諭兀良哈韃靼野人諸部曰今天下一家邊將言爾

諸酋長誠心歸向朕用嘉之特令百裴牙火里勅諭爾其


各居邊境永安生業商賈貿易一從所便欲來朝者與偕至

北平左布政使郭資為戶部尚書仍署司事

夜月犯太微東垣上相星

癸卯岷王榷來朝

夜大星青白光自太子星旁流游氣



重慶府教授馮莊甫秩滿止貢士三人降學正著為令

左副都御史陳瑛勅禮部侍中黃觀太常寺少卿廖昇翰林
脩撰王叔英衡府紀善周是脩浙江按察使王良沛縣知縣
顏伯瑋等其存心不異畔逆宜追修 上不問

乙巳朝鮮國王李芳遠入貢

丙午夜金星犯壘壁陣曉刺月犯罰星

己酉夜大星青白光自太子旁流天棂曉刺大星赤光燭地
自紫微西藩流入輦道旁有二小星隨之

十二月庚戌朔寧化王濟煥永和 王濟煥來朝


駙馬都尉宋琥尚安成公主

右通政李至剛為禮部尚書

量免北平山東河南鳳陽淮安揚徐歲辦有差

辛亥 上曰公侯歷事 皇考者今皆年邁朕不忍勞非見
任事者其令以朔望朝參

壬子勅諭功臣曰古人主以武功定天下者必賴將臣之力
厥後往不能保全何哉處高位者易驕縱犯刑法者多怙
終人君代天理物豈容私其間哉所以罰加焉必也 高皇
帝立法垂憲欲世世行守功臣有犯罰戒再三戒之不改乃



按誅之至親至舊不敢曲原志人君子莫不謂 高皇帝英
明果斷上畏天命下畏民情也爾諸功臣皆受 高皇帝厚
恩今事朕、欲爾等悠久共富貴若復驕縱怙終不問則違
高皇帝成法問而寘諸法必謂朕寡恩今錄 高皇帝戒勅
申明布告尚永遵之爾之不遵後悔無及
嚴武臣冒襲之禁

癸丑蠲北平山東山西河南鳳陽淮安揚徐明年夏稅絲棉
并山東鹽司虧課
以荊州長沙商稅予遼王谷王


甲寅遣諭哈烈徹撒馬兒罕等國各賜金織文綺

詔諭別失八里王黑的兒火者并賜以綵幣黑的兒火者元
裔也

戶部議京官軍士支俸格公侯駙馬伯祿全支米文武官一
二品支米十之四三品四品支十之五五六品支十之六七
八品支十之八餘折鈔每石准鈔五貫九品雜秩吏胥旗軍
並全支米從之每石增鈔五貫

乙卯復設各郡縣陰陽醫學

鴻臚寺序班汪觀清為古寺丞本胡人諳番書



丙辰設雲南益養木邦益定三府威遠鎮沅二州以土官刀
木旦罕的法刀渾立為知府刀筭黨刀平為知州
丁巳許欽天監官秩滿不考績著為令
庚申保定知府維僉加刑部尚書
辛酉設廣西安隆長官司隸泗城州
寧夏提兵官何福請討邊下叛去者勅曰若兵討叛其未叛
者亦將置疑不若姑聽其去第嚴兵固圍養兵觀衅可也
壬戌定梁集軍吏代法萊陽縣人王丑保言洪武中戶三丁
以上梁正軍一正軍死貼戶補役從之


癸亥復慶遠衛軍民指揮使司改廣寧中左右三衛仍為中
左右前後五屯衛設寧夏左右中前四衛

甲子韃官胡將怯烈帖木兒哈刺脫歡李刺兒來歸仍授千
戶怯烈帖木兒言哈卜兒却罕等五百餘人居塔灘咸欲內
屬勅何福招之

己丑銅陵典史張璉為左通政舊北平按察副使

江西儒士軒伯昂為山東布政司左叅議時詔求懷才抱德
之士

金吾前衛指揮僉事徐膺為中軍都督僉事徐達之子也



丙寅滄州益山等縣饑詔民採鹽易粟者勿禁
夜月犯軒轅御女星

丁卯成安侯郭亮鎮守永平山海

上問兵部尚書劉儻天下數馬曰比兵耗止二萬三千七百
餘匹 上命循洪武故事嚴督所司孳牧

戊辰都指揮同知趙忠為後軍都督僉事

己巳義烏教諭高澤疏請攬政納言 上嘉納之

庚午諭禮部京官及外親官吏使俱預元旦宴監生諸生吏
僧道軍民人等俱賜鈔

壬申許北平保定永平民兵還籍

癸酉諭戶部來春遣大勸耕江北因嘆曰古者民無菜色然
後天子安享誠四海皆足雖不盛饌未嘗不樂

甲戌壽昌王孟焯來朝


丁丑賑順德保定貧民鈔三十萬錠

嘉定周程請治東吳水利從之

夜大星青白光自軍門流庫樓

戊寅享太廟

夜大星青白光燭地自太陽旁流北平杓



國權

永樂元年癸未

正月己卯朔御奉天殿受朝賀

庚辰勅中外文武臣曰朕惟天德好生人君承天愛人而已

夫輿圖之廣非一人獨治自古帝王與賢共之我太祖皇

帝受天明命勤愛保養生息三十餘年政教敷明近古鮮儷

亦惟任天下之賢理天下之務旁求民隱宣通德意用厥臻

茲朕靖難承統重惟天下皇考天下軍民皇考赤子即


國權

永樂元年

一

益官設遷孺木著

國家圖書館, NATIONAL CENTRAL LIBRARY, TAIWAN, R.O.C.



位以來夙夜匪寧爾諸文武臣朕體茲懷毋怠毋忽毋虐毋
貪毋為掎克毋縱詭隨持爾廉平秉爾正直屬爾公勤擴爾
忠恕共守成憲毋或有違惟民出賦稅以贍軍惟軍執干戈
以衛民軍非民不食民非軍不安惟爾文武群臣互為保愛
無有侵害惟 皇考成憲實萬世治安之具遵之則吉違之
則凶其悉心一志敬之慎之
朝鮮及朶甘烏思藏必力王瓦等國入貢
宴諸王于華蓋殿
北平流民復業者十三萬六百餘戶

辛巳罷松陽縣銀坑以礦竭也

甲申復前應天府尹向瑄官

乙酉享太廟悉遵 高皇帝定制


丙戌羣臣請立太子不允

丁亥左副都御史陳瑛為左都御史桂林同知史仲成為右
僉都御史

戊子命汝南王有燠居雲南之大理以弗容于父也

止營州三護衛官赴京

辛卯 上南郊




禮部尚書李至剛等請遵 高皇帝中都之制立北平承宣
布政使司為京師從之詔改北京

謝彬曰商遷五都不別置負周營洛邑惟命保釐漢唐舊
邦止設京尹宋于西京亦命留守今保釐京兆之任即府
尹是已未聞兩都並建六卿如今之日也說者以為京師
者大眾之義也物無兩大之理故往々輒有異議至謂南
京吏部不典銓選禮部不知貢舉部無斂散之實兵部
無調遣之行視古若為兄負嗚呼是豈知 祖宗設立之
初意有未易以常情窺測者夫宮闕陵寢所在六軍城守

之事府庫圖籍之所儲東南財賦之所輻輳雖設六卿以
分理之猶懼其不給也而况以為兄負而輕議之哉邱文
莊有言天下之財賦出于東南地而金陵為其會戎馬盛
于西北地而金臺為其樞並建兩京所以宅中國治足食
足兵據形勢之要而為四方之極者矣嗚呼得之矣
設遷曰漢立兩都宋設四京究其陪畿不異郡國今兩北
述郊各為輦轂及涿鹿之鼎長拱既久秣陵絕駕而百司
並置如故也班張復肉鼓吹休明不其盛典

癸巳遣官祀歷代帝王 命保定侯孟善鎮守遼東



增周王歲粟二萬石 復高以正監察御史

詔許僧道三年給牒

甲午定牧馬法壯馬一配牝馬三歲課一駒給軍士非徵發不得擅遣

夜月食陰雨不見禮部請賀不許

乙未設者樂甸大侯平崖灣甸潞江五長官司隸雲南都司

寧夏左右護衛改寧夏衛中衛

夜月犯太微垣左執法

丁酉後軍左都督宋晟為平羌將軍總兵官鎮守甘肅等處

己亥燕府典膳副王真為光祿寺少卿

庚子宛平縣丞宋斌為真定知府前守城有功龍虎衛經歷

徐文英為浙江道監察御史進士洪湛為廣東道監察御史

壬寅夜大星赤光流雲中

甲辰設普安安撫司土酋慈長為安撫使初曰普寧改焉置


流官吏目隸四川布政司

丁未夜木星犯建星

二月戊申朔前軍都督僉事山青卒

江南徐州人本燕府左護衛百戶

己酉行人司副李常為光祿寺少卿汀州推官高政為寺丞




庚戌設北京留守行後軍都督府北京行部北京國子監改
北平府為順天府北平行太僕寺為北京行太僕寺行都督
府置左右都督府都督同知僉事無定自行部置尚書二侍
郎四六曹吏戶禮兵刑工及郎中員外郎主事官各一
辛亥戶部尚書郭資刑部尚書雒僉俱為北京行部尚書安
岳知縣康汝楫 按察使僉事馬京為左侍郎江西臨江
知府劉翼南京戶部郎中李昶為右侍郎汝楫蓋舊郎臣也
壬子廣西臨桂縣丞譚勝受建陽知縣陳敏蒲縣知縣文郁
監生孔復楊鈺張文明李時秀蔣彥祿歐彥貴何器劉先為

監察御史

命賑山西平陽饑 嚴民間誣告之法
甲寅遣左通政趙居任賜朝鮮國王金印龜紐如國初以建
文更之也

詔諭暹羅國王昭祿群膺哆囉諦并賜駝紐鍍金銀印一
乙卯書戒代王桂 曰別久懷思聞吾弟縱侈取財國人甚苦
告者衆矣果若其言吾弟大謬夫天下之人 皇考四十年
辛勤保養以遺子孫其罪合死猶當請命况乃實無罪吾弟
審思拘囚困辱不記建文時耶



命監察御史分巡各省民瘼

丙辰監生范紹馮添劉志聰吳楨徐儀彭建初孫恒教惟善
張信黃珪王常俞騶周瑞邱陵李珣韓溫劉鳳蘇冲葛忠遜
邊仲庸熊璞等俱為監察御史

丁巳釋奠太學


戊午祭太社太稷

己未遣諭迤北可汗鬼力赤曰元運既終我皇考太祖皇
帝恭受天命撫有天下朕以嫡子奉藩于燕人入繼大統嘉
與萬邦同臻安樂比聞塞北推奉可汗特遣指揮朵兒只恍

惚等賫織金文綺四端致朕意今天下大定薄海內外皆來
朝貢可汗能遣使往來同為一家豈不休哉并勅諭太師右
丞相馬兒哈咱太傅左丞相孫台太保樞密知院阿魯台等
賜文綺各二

卜攻破遼東懿路寨勅鎮守左都督劉貞謹守不可窮追又
勅寧夏總兵官何福加備

甲子武定侯郭英卒英鳳陽人從起滁泗渡江從戰禁江武
昌從大將軍開北平鎮北平以前軍都督僉事屬潁川侯征
雲南洪武十七年封祿二千五百石追封曹國公謚武襄



設遷曰郭武定以渡江之舊至甲子始享茅土則征南功也今稗說謂英射陳友諒縛張士誠其績似偉高皇帝忍遺之耶嘉靖中裔孫翊國公勛購門客創飾之偉躋太廟不足信也噫胡藍之黨靖難之累諸徹侯往々不令終英考全牖下亦善于保富貴者矣

乙丑 皇長女永安郡主改封永安公主儀賓袁容為駙馬都尉

封尚烈永興王尚煜保安王
遣司禮監少監侯顯徵烏思藏尚師哈立麻 上素聞其道

行卓異也尚師本帝師史諱之

胡將伯帖木兒等自塔灘來歸授指揮使命居寧夏

丁卯南昌左衛改南京護衛營州左護衛改隆慶左右衛中

護衛改寬河衛


除麓川宣慰司加課萬八千金

戊辰諭戶部兵部以衛所郡縣官私軍民者罪之役

都督僉事徐真卒真盱眙人以軍功歷左軍都督僉事戰靈璧敗降命督民屯田密雲嗜酒竟以醉死

己巳琉球國中王察度入貢上表

大名河間廣平順德真定保定饑賑之



禮部請今年八月補京省鄉試從之

殺江西南昌知府臨海華惠仲惠仲初授廣武衛知事建文
初以知縣充史官脩洪武實錄進守南昌至是坐實錄
指斥舊事且方孝孺黨也年六十四妻蕭給千戶秦貴為奴
辛未命法司五日一引奏罪囚如洪武例會訊于承天門
寧夏右衛改慶陽衛 疏嘉定秦趙二涇

壬申瘞江北中原暴骸

甲戌高陽王高煦率兵往開平操備旣行書諭之曰爾出太
寧未至開平四十里即下營先騎偵勿令覺乘以深入

夜襲之若戰則武安侯鄭亨居中安平侯李遠武城侯王聰
左右之爾將精騎一二千援之毋利其牛馬窮追也


乙亥減曲靖中鹽米二石為一石五斗

丙子緩輝縣官牛之價

丁丑定捕盜賞格金五十兩幣四鈔二千貫

分遣監察御史中官覈各處銀冶

三月戊寅朔群臣復請立太子不允初靖難兵起高陽王高煦
武勇使從師領勅騎接戰白溝東昌有功 上戰浦子口而
卻高煦縛胡騎力戰敗盛庸因渡江故甚愛之及即位嘗密



召邱福王寧及侍郎金忠義儲俱請立高煦以功高于世子
立子以長平世之道也金忠不可已問學士解縉對曰以臣
所見異是世子忠敬仁孝天下莫不聞守成令主也且奪長
為亂道又曰好聖孫也召禮部主事尹昌隆于便殿對如之
命昌隆勿復言復召問庶子黃淮又對如之翊日早朝方罷
上獨留解縉語之良久戒勿復言遂賜象笏

設遷曰煦汗馬功江上之捷業允其當璧故不欲中變遷
延未決其後迫于國是雖大本不搖而江保黃儼輩讒構
未已也噫仁廟之得儲也其不為建成之續者亦幸矣

已卯魯世子肇輝嗣魯王

前北平按察副使王禮為戶部右侍郎

夜大星青白光燭地自郎將旁流至紫微西藩


庚辰江陰侯吳高鎮守山西大同

誅遼東都指揮同知沈永以寇三萬衛不以聞及入朝復
隱不奏誅之令兵部榜諭天下有欺蔽者罪如沈永

壬午北平行都指揮使改大寧都指揮司隸後府設保定左

右中前後五衛俱隸大寧都司

甲申昏刻有大星青白光自南河流入游氣中



乙酉江都郡主薨

懿文太子之長女儀賓耿璿

丙戌琉球國山北王攀安知入貢

丁亥諭兵部以守九門功再進一級于是都督僉事劉江為中軍都督同知許成為左軍都督同知譚青為後軍都督同知都指揮使童信為前軍都督同知徐善為中軍都督僉事曹隆馬瑛為左軍前軍都督僉事都指揮同知呂得昇方敬為中軍都督僉事周長為左軍都督僉事冀英王祺為後軍都督僉事王忠為前軍都督僉事

戊子平江伯陳瑄及前軍都督僉事宣信俱充總兵官各率

舟師海運瑄往遼東信往北京 是月開封蝗賑以菽麥

辛卯岳敏周樂喻良為監察御史初敏河南按察副使良僉

事樂陝西左叅政皆罪免尋改官

琉球國山南王弟汪應祖入貢


壬辰命命婦遇節朝中宮餘免

癸巳夜有大星青白光自天幅流尾宿

甲午北京山東河南鳳陽淮徐饑賑之

乙未以山西澤州潞安民稠土狹分佃裕州

丁酉都指揮同知周廣為左軍都督僉事



蘇州大雨水決隄傷稼命葺治

戊戌脩殷太師比干墓祠

瀋陽中屯衛軍唐順言衛河出輝縣西北八里太行山流徑
衛輝抵直沽入海南距河陸路才五十餘里若開衛河距黃
河百步置倉受漕糧轉至衛河甚便 上從之

己亥夜有大星赤光燭地自太子旁流軒轅

辛丑鄧州官牛疫有司迫民償至鬻其子女 上聞而怒之

免民償罪有司擅責者

夜大星赤光燭地自 流雲中

壬寅京師大雨水

乙巳諭兵部再申傳不急之務非奏行者罪之

四月丁未朔安南攝國事胡奩入貢表賀卽位且奏前王陳日

燿卒無子臣陳氏甥權國事主祀四年乞封爵效貢禮部言


遠夷荒忽難信宜遣使廉察從之

戊申勅曰朕賴天地宗社之靈 父皇母后之佑以有天下

允更改 父皇之成憲濁亂天下之奸惡悉就誅僂其餘文

武官仍用無疑陞賞亦罰從至公而已昔唐太宗撥亂反正

貞觀盛治近古罕倫求其故則太宗善用人釋王珪魏徵之



嫌怨舉李靖尉遲敬德于仇敵用房玄齡杜如晦于異代宋
太祖起甲冑平列國與世休息開三百餘年洪基亦惟其時
信任朝前舊臣范質王溥石守信王審琦等夫是二君尚借
異代而况朕父皇之臣非仇怨他人之比近有尚懷疑慮妄
生異議處事則不盡心此不明朕推赤之意也夫人主代天
理物故曰天子奉行天命故曰天命更若無天命有力者皆
得為矣元有天下廣土衆民國富兵強孰得而勝之天命一
群雄並起爰統一于我高皇帝而我高皇帝又其其才
釋怨錄仇所以創業垂統身致太平今朕豈敢偶違天命與

父皇之德盡忠于國者雖仇必賞心懷異謀者雖親必誅今
敢有妄分彼此懷疑怨謗不安于職事者事發族滅

己酉戶部尚書夏原吉往治浙西水利時嘉興湖州及蘇州

松江歲罹水災

庚戌周王橚請立太子未允

壬子平陽王濟熿來朝

遣鎮撫答哈帖木兒等勅諭瓦剌酋馬哈木太平把禿字羅

戶部右侍郎王禮卒


禮河南固始縣人擢北平按察副使坐
事降福建邵武通判上即位召用之

癸丑罷中軍左都督劉謙

國權

永樂元年

十一



甲寅楚世子孟焯永安王孟炯來朝

乙卯周世子有燬順陽王有烜來朝

袁州府訓導廖敬先為翰林院檢討

曉刻有大星青白光自牛宿流入游氣中沒

丙辰通政司左叅議李文郁為戶部右侍郎監生余得之為

科給事中政張原汪俊民趙能等俱為監察御史

戊午蜀世子悅爌來朝

是月浚江南華亭上海等縣運益河

已未賑上海縣饑民粟四萬九千九十餘石

庚申長山王賢煖來朝

辛酉行人楊渤等使安南諭其國人推立胡查果否以聞

都察院右副都御史張信黃信禮部尚書李至剛妻父坐臺

獄論死乞免 上問何以知之曰黃信告臣刑科都給事中


周璟等劾其泄事故

壬戌夜有大星色青白光燭地自輦道流入游氣中

癸亥萬壽節宴文武諸大臣

甲子楚世子孟焯欲買河南人口勅曰河南周王封也汝遣

人入遣境或有縱恣將為爾累可不慮乎



乙丑諭寧夏總兵官何福甘肅總兵官宋晟以月犯氐宿占
主大將有憂又金星出昴北主北軍勝卿等守邊宜加警省
設遷曰天道遠人道邇金星出昴北臚胸河之敗五將不
返兆見此矣
作鹵簿大駕

丙寅勅鎮守雲南西平侯沐晟拔總旗中之功最者為百戶
以勵軍士
禁民間金銀交易以通鈔法犯者准奸惡論
丁卯以代王桂擅役民命自今非朝命毋擅發

河州洮州番族入貢定賞格

癸酉以駙馬都尉胡觀僭乘晉王棕轎見劾宥之

甲戌襄城伯李濬充總兵官錦衣衛指揮陳敬副之往鎮守

江西

丙子中軍都督僉事孫岳以建文中在鳳陽毀寺材脩戰艦
免官安置海南

丁丑降岷府官屬勅戒之以不能輔導也


五月丁丑朔賜岷王楸冊寶并勅戒之

諭戶部但郡縣荒田即除其租庶免民橫擾

國權

永樂元年

十四



戊寅賜秦王尚炳書前令諸郡王出居近州縣練習講讀念
四方水旱蝗蝻道殣相望脩葺供億勞費軍民勅至且令在
國成造居室其即日罷又戒晉王濟熿令有司每二十里設
一火燎橋梁道路悉皆治除今何時也而勞民如此乎
庚辰禮部以太祖之忌日請令僧道誦經朝天宮不許
辛巳命福建有司作海舟一百三十七艘以防倭寇
必里千戶所為必里衛女直
倭寇福建金山千戶所副千戶李敬逐之斬五十八級獲十
一人焚賊舟一獲舟二陞李敬指揮僉事

築湖廣安陸州京山縣江隄

太醫院使戴原禮致仕

壬午設北京社稷壇祠祭署

癸未北京行部郎中張執中為應天府丞

宥雜犯死罪以下俱戍興州文武官停俸並輸作百日

太白晝見

欽天監奏火星犯壘壁陣占將軍為亂宮中兵起之象


書切戒高煦

甲申封駙馬都尉袁容廣平侯李讓為富陽侯世襲

國權

永樂元年

五



乙酉四川越雋邛部州改為邛部長官司仍流官吏目
前北平布政司左叅議成璉卒璉揚州興化人監生授山西
代州學正進守蔚州以有守城功 上即位進叅議贈吏部
左侍郎厚賜其家子傑磨行人司行人
丁亥右軍都督僉事李彬為都督同知封爵豐城侯中軍右
都督陳懋封寧陽伯贈金鄉侯王通子真封武義伯都指揮
同知王友封清遠伯都督僉事陳賢封榮昌伯都指揮同知
知張興封安鄉伯陳志封遂安伯俱奉天翊衛宣力武臣世
襲祿一千石

遣監察御史劉從政等往諭保靖宣慰司屬蠻人仇殺
已丑勅駙馬都尉廣平侯袁容掌北京留守行後府事
夜大星赤光自雲中流婁宿
庚寅遣使捕蝗山東


五月癸巳朔鈞州蝗免今年夏稅

甲午封皇五女常寧公主

設順天府儒學裁大興宛平二縣學如應天例

乙未勅戒代王條其三十二罪俾改過

勅北京留守行後軍都督府詔諭口外逃軍聚劫者



勅兀良哈官軍人等但來朝者俱各授官故地互市

時議洪武中犯黨逆黥刺為建文中用者俱發原配所有未
犯罪為齊泰黃子澄薦用者俱為氓上不聽但洪武中黨
逆發原配非黨逆而黥刺者罷為氓

丙申置北京義勇後衛神武中衛忠義中衛隆慶衛各衛經
歷司

太僕寺少卿祝萬獻市朝鮮馬千匹將至命盡給遠卒

丁酉南安府通判李敬初為太僕寺丞

河南蝗免夏稅

戊戌禁四川碶門黎雅河州臨洮等處私茶

己亥論守城功前北平左叅政孫瑜為戶部左侍郎左叅議

朱濬為左通政按察使喬穩為兵部左侍郎僉事楊泰為順


天府尹

庚子前軍都督同知陳恭為右都督掌北京留守行後軍都
督府事

辛丑都指揮使高實為左軍都督僉事叅贊陳泰軍務

故都督僉事陳文子敬為前軍右都督食祿俟年長任職

壬寅賑山東歷城等縣饑



金星晝見

甲辰諭天下諸司事干王府俱啟王知之

夜大星青白光自紫微西藩流內階曉刻五星皆見于東方

丙午廣東南海番禺等處潮溢壞民居

六月丁未朔許軍士六十以上還鄉以壯者代

戊申沐昕為駙馬都尉尚常寧公主

刑科都給事中周璟為山西右布政使

庚戌致仕戶部尚書王鈺言三事曰囚人不分籍但挨程安

置曰攢運冬衣布花及時給邊卒曰通州迤東驛每站撥官

馬十匹悉從之

辛亥上苦久雨遣戶部侍郎李文郁往佐夏原吉治水

壬子削代王三護衛止給校尉三十人勅戒之

設遷曰代岷見削靖難所繇名也而惇睦如文皇亦未

能曲貸桀驁既久怨艾無聞今獨歸咎于建文者何也

癸丑遣監察御史袁綱給事中朱亮等撫安浙直軍民

甲寅五色雲見


丙辰夜金星犯畢宿

丁丑上皇考太祖聖神文武欽明啟運峻德成功統天大

國權

永樂元年

大



孝皇帝 孝慈昭憲至仁文德承天順聖高皇后尊謚冊高寶

戊午詔天下仍頒安南暹羅諸國歲貢來朝

設水東垂西二蠻夷長官司隸貴州都司

夜大星青白光流雲中一小星隨之

辛酉 太祖高皇帝實錄成賜宴諸臣

甲子河南郡縣蝗不以聞遣御史按之罪有司

丙寅以實錄勞吏部郎中徐旭為國子祭酒太常寺博士錢

仲益知縣楊觀梁潛王褒為翰林脩撰國子助教王述給事

中朱紘為編脩行人蔣驥為檢討國子博士金玉鉉為五經

博士晉府伴讀蘇伯厚為侍書教諭解榮劉宗平為待詔教

授張顯為國子學正訓導傅貴清羅師程為學錄 知府

劉長禮部郎中胡逸為江西左叅政左叅議廣東按察僉事葉


李燁為福建左叅議知縣趙季通為國子博士按察僉事葉

砥改吏部考功郎中知縣唐廣雲為監察御史楚府教授吳

勤改開封教授騰鳳官主事陸顯端孝思為禮兵部員外郎

監生鍾子勤陳彛訓劉謙沈文為中書舍人朱逢吉葉藩沈

紹先華嵩喬岳衛浩鄭中余從善陳俊良陳寶為監察御史



諸生金寔為典籍汪琦等十人為知縣

丁卯增行部戶曹主事一人

泉州衛金門千戶所械至海島逃民上宥之且問其尚有未

歸者乎曰有之因遣勅往諭

戊辰始遣中官祭中雷

武安侯鄭亨死充總兵官武城侯王聰安平侯李遠充左右

副總兵備禦宣府

宗人府經歷黃中引疾特許致仕

庚午尚寶司丞李得成為陝西布政司左叅政得成雖不學

能數言民事 上重之

辛未朝鮮表謝且請冕服許之

壬申浚昌邑河渠

金星同月晝見

夜大星青白光自騰蛇流雲中

甲戌復鎮番衛建文中曾改守禦千戶所

乙亥舊承奉司改北京內官監


七月丙子朔命翰林侍讀學士解縉等輯永樂大典


戊寅詹事府錄事馬俊寧德知縣吳可成威海衛試經歷余

國權

永樂元年

二十





延慶寧遠縣丞黃重玉山縣典史李傑監生汪必先林震劉

觀郭林金英張翥陳英楊泰劉寔王文等俱為監察御史

己卯定靖江府輔國將軍品級禮儀

甲申夜金星入井

丙戌 上諭兵部曰漢文帝時閭巷有馬千匹為群其聽民畜私馬

賑淮安徐州粟八千四百八十餘石

己丑復戶部左侍郎嚴竒良右通政邱顯官

興寧試知縣汪澄為廣西道監察御史

致仕禮部尚書鄭沂來朝命署禮部

庚寅遣指揮章來等詔諭迤北可汗免力赤曰有天下者必得天命非人力也宋失天命元世祖得之嗣後荒縱民散政乖又復失之我高皇帝削平禍亂統馭華夷豈人力也哉朕承天休入承正統重念帝王以天下為家遣使者報書幣可汗當知天命廢興之故講好脩睦乃聞竊有覬覦古云順天者昌逆昌者亡可汗寧不鑒此再書諭意并致儀物可汗審之遺繒綺表裏各二仍賜所部馬兒哈等各一

辛卯夜月食而不見

國權 永樂元年

癸巳北京行部左侍郎許思溫為吏部左侍郎右侍郎墨麟
為兵部右侍郎行部郎中王禮為戶部左侍郎前北平布政
司右叅議盧祥為刑部右侍郎

甲午真定知府呂震為大理寺左少卿

新昌伯唐雲卒雲不詳其始事燕王領侍衛年長諸將勇智
服衆屢從戰守以都指揮使封世指揮使

乙未免江南崑山縣水災田租六千二百八十石

丙申戶部尚書郁新言漕運自淮安舡可三百石以上入淮
河沙河至陳州更舡可載二百石以上至跌坡更大舟入黃

河至八柳樹陸運赴衛河入京 上從之

丁酉周世子有燉來朝

占城國王占巴的賴入貢

夜大星白光自奎宿流壘壁陣

戊戌夜大星青白光自參旗流入回瀆有一小星隨之

己亥前北平按察僉事謝池為大理寺右寺丞

遼東金州等衛蝗命捕之


庚子夜二大星俱青白光一自天樞流至文昌一自離宮流

入匏瓜 癸卯紹興知府李慶為刑部右侍郎

國權

永樂元年

三




甲辰夜大星青白光自天津流入游氣
乙巳夜大星二俱青白光一自羽林軍流至近濁一自北落
帥門流入近濁


八月丙午朔浙江處州知府劉仲蕙為工部右侍郎

戊申遣右僉都御史俞士吉賜戶部尚書夏原吉水利集至
是原吉上言浙西諸郡蘇松最居下流為水所鍾常州嘉興
湖州高田多環以太湖綿亘五百里而寬納杭州湖州宣城
歙縣諸水散注澱山等湖以入三泖頃浦港湮塞流漲溢傷
農稼為甚法宜疏吳淞江袤二百餘里廣百五十餘里丈西

接太湖東通海前代蓋屢疏之然當潮汐衛旋通旋塞吳淞江從

長橋抵下界浦約百二十餘里雖通流然多窄淺從下界浦
抵上海太倉南滙清浦可百三十餘里潮汐淤已成平陸欲
開濬費大且灑沙淤泥浮泛動盪雖施工匠臣竊按視嘉定
劉家港即古婁江通大海常熟白茆港徑入江皆廣川通流
宜疏吳淞江兩岸安亭等港浦引太湖諸水濬劉家白茆二
港使其勢分松江大黃浦乃通吳淞要道下流塞難濬傍有
范家浜至南倉浦達海徑可濬令深濶上接大黃達泖湖之
水庶几復禹貢三江入海之舊水道既通乃相地勢置石閘





以時啟閉歲水涸時預脩築圩岸防暴流如此水患方可息

上從之役民間濬

原吉布衣徒步晝夜行經度疏濬築捍一切情事皆身先勞之而不使虐民故功成

蘇州知府湯宗下獄坐視水患故也

已酉能吏周讓為戶科給事中

山東安邱縣紅河決傷稼壞民舍遣築隄

夜金星犯鬼宿

辛亥脩安徽和州圩岸

翰林院侍讀胡廣編脩王達主試應天

癸丑行人呂讓邱智使安南按察副使聞良輔行人甯善使

瓜哇西洋蘇門答刺科給事中王哲行人成務使暹羅行

人蔣賓興王樞使占城真臘行人邊信劉元使琉球翰林待

詔王延齡行人崔彬使朝鮮各賜其國王絨錦幟金文綺紗

羅有差并勅安南王胡查毋持強侵占城

丙辰禮部言鹵簿宜有九龍車又舊金鉦紅鼓四鮑燈紅油

紙燈各三雙上曰先朝定禮豈可輒增第補其舊

癸巳設浙江福建廣東市舶提舉司始命內臣齋喜

提督廣東市舶

乙未左通政趙居任行人張洪僧錄司右闡教道成使日本

庚申設雲南楚雄縣儒學

國權

永樂元年

三十四

辛酉賜晉王濟煇書戒其弟濟炫擅給驛書

乙丑平江伯陳瑄海運四十九萬二千六百餘石赴北京

丙寅羽林前衛致仕千戶王欽訢歷城侯盛庸不法賜銀鈔進指揮同知

己巳定罪囚謫佃北京例犯杖給牛種五年後賦役如民田犯徒流不給直三年後如民田

庚午內官楊宣等勅諭麓川車里八百老過古刺詔閩特冷冬烏蓋定孟養木邦等土官

復甘州前後衛威遠衛鎮夷千戶所

曉刺老人星見

辛未潮州地震

癸酉前北平都司經歷吳中為大理寺丞瀧水知縣徐敬為

監察御史荊州試推官濮銘為雲南右叅政

甲戌夜大星青白光燭地出敗瓜西行天市垣至帝座旁

九月丙子朔論中外諸臣曰為君難為臣不易創業難守成不

易剛柔寬猛適其中禮樂刑政有其序唐虞三代至漢唐宋


率由諸道是故舜問清下民報虐以威誅四凶舉五官明五

刑然後無為恭也神禹承之無間可議夏桀之亂民從其暴


國權

永樂元年

十五



成湯之興無弱攻昧取亂侮亡肇脩人紀用革協淫既奠四方子孫承之惟監于成憲殷紂之亂商俗靡周公相成王誅紂伐奄遷殷頑民滅國五十繼相成王制禮作樂垂拱仰成刑措不用漢承秦亂高祖令蕭何定律令韓信申軍法張蒼定章程法令嚴明惠帝清靜至于文景除挾書已肉刑務崇寬厚唐承隋末諛諛汰侈暴慢成風高祖定官制頒律令行租庸調法沙汰僧尼道士勲臣犯法無所假貸太宗貞觀之後懲斬趾禁鞭背刪定律令變重為輕力行仁義几致刑措宋興承五季之亂太祖太宗頗用重法糾奸懲慝躬自折獄務底明慎立法制嚴用法情恕咸平以後刪其繁密益務寬仁子孫承之舍弘光大恭儉純誠未嘗殺一不辜此歷世守成創業之事剛柔寬猛禮樂刑政厥中厥序莫不遞用朕太祖高皇帝天錫大聖之資以當非常之變奮自布衣撥亂反正此三代漢唐宋創業之時又大相遠蓋中華禮樂化為左衽沉浸百年陵夷已甚太祖服古人所未服易齊古人之所未能齊兢業勞心焦思晝夜圖維經權常變不得已而用刑特權時之宜耳及立為典常既有定律復為祖訓墨劓荆宮並禁不用朕克遵成憲仰思聖謨夙夜祇服惟欲



興禮樂舉賢才施仁政以忠厚為治爾尚各共乃職敬乃事
勿為朋比勿事貪黷勿恣情縱欲以干匪彝至于用刑必欽
必慎期于刑措用臻康理以上不負皇考創業之艱而朕
于疇成之道亦庶几焉
曉刻金星犯軒轅左星
丁丑夜土星躔于女宿留于十二諸國代星之上帝不
戊寅山東高唐人王政言事稱旨擢刑科給事中不並
已卯大興縣進嘉禾薦太廟
夜大星青白光自虛宿入羽林軍有二小星隨之

庚辰嘉興知府劉觀為雲南按察使未行改戶部右侍郎

瓜哇國王都馬板入貢

辛巳勅吏部曰任官圖治之基也求賢任官之本也 高皇


帝聖德光華萬邦黎獻共惟帝臣肆朕眇躬克正大統永惟
萬幾不敢暇逸思欲旁招俊乂光輔邦家必明目達聰以和
弘視聽內外諸臣尚體朕心于群臣百姓之中各舉所知無
間遠邇並以名聞書曰舉能其官惟爾之能舉非其人惟爾
不任古訓具存爾其懋哉

壬午開四川夾江縣并益

國權

永樂元年

二十七



脩西華縣决隄

夜大星青白光自天苑行至雲中

癸未雲陽伯陳旭往南畿閱軍

寶源局鑄農器給山東被兵之民

夜有大星赤色自七公行入天槍旁五小星隨之

乙酉夜大星青白光自羽林軍行至雲中

丁亥設大同左右二衛

戊子浙江開化縣丞王鐸為禮科給事中布衣劉士傳為兵

科給事中山西布政司照磨周幹為山東道監察御史

脩山東鄆城縣决隄

庚寅遣中官馬彬等賜瓜哇西王都馬板勅印并詔諭西洋

蘇問荅刺諸番各賜文綺紗羅

大寧都指揮僉事王庸嘗掠斃居民宥死戍邊


辛卯鎮守貴州鎮遠侯顧成上言雲南廣蠻寇如灶上掃

除東南狡倭沿海嚴防亦無足慮惟北遺孽點悍遷徙鳥

舉即之如搏影終為國患及今小康數使賞賚慰藉偵伺

動靜高城浚湟屯田積粟厲兵秣馬不宜一日懈若留家漢

北輕兵入寇據險設覆彼騎不得施出不得展蹈瑕候間我



可得志如是數年上難紓矣國家大事臣所欲言者早立東
宮贊萬幾使天下臣民共享太平之福上甚善之賜金幣
壬辰吏部尚書蹇義等言建文中授官被斥不宜復上曰
此皆皇考所遺安得以建文故而棄之第量才擢用上曰
夜月犯畢宿

癸巳陝西行都指揮僉事張豫坐易官鈔戍邊

夜大星赤光自天倉入天囷

甲午設雲南騰衝永昌二守禦千戶所

鎮守雲南西平侯沐晟言車里宣慰司土官刀暹答侵威遠

州執知州刀筭黨宜討之上諭兵部遣諭之如果不聽兵

未為晚也已而入貢謝罪

夜水金星並見東方

乙未都察院左都御史陳瑛等劾歷城侯盛庸怨望懷異命


削爵

丁酉命撰皇考樂章

復越州平夷廣南三衛

已亥遣內官李興等勅勞暹羅國王昭祿群膺哆囉諦刺

禮部以日本貢使至寧波請籍其兵器刀槊等毋民鬻上



命官市之以安其心

庚子 上諭右順門諭左右侍臣曰朕宮中丙夜坐閱圖籍何郡罹饑荒何郡迫邊鄙旦與群臣計議行之河南數處蝗旱朕用不寧使者省視不絕于道如斯民小康朕之願也賜各衛胡人姓名

雲南左中前三護衛改為雲南中前後三衛時岷王因事有罪革之

壬寅禮部尚書鄭沂戶部左侍郎嚴竒良通政司右通政邱顯俱致仕勅宴 上顧禮部曰是皆特皇考舊臣自今後舊

臣老致仕者禮之視沂毋得有貶

十月乙巳朔定軍功襲職例

丙午承天門守禦千戶奏工匠人等遺牌無名氏列寶鈔提舉司官吏不法 上以私忿毀之命後蜚語俱置勿問 戊申築浙江杭州江隄


上謂六科給事中曰今四方蝗旱民之艱食宦寺服食朝廷乃有畜養雞牲糜費食米者此輩論其一日當饑民一家之食業行禁戒爾等識之再爾不宥

設遷日官監飼牲至瑣細也輒干嚴諭而齊喜任市舶李

國權

永樂元年

三十



興使絕域開豐貂勃馮恃威命其糜費且不勝計市上既
總功之察而言官噤不敢發何也

咸陽縣侯張武卒武瀏陽人燕山右護衛百戶從靖難封詔
達有勇力稍涉書史賜祭葬贈潞國公謚忠毅
己酉刑部右侍郎盧祥為左侍郎

大理寺卿薛嵩等奏各布政司所上死獄請遣御史分決從
之命左都御史陳瑛等授御史簡書慎刑之意臨決苟有可
生即與辨釋

夜大星青白光燭地出雲中行至近濁


辛亥辟任守禮戶科給事中

壬子宣城訓導周彥奇為刑科給事中

夜大星青白光自附路旁行入游氣中又有大星自太微西
垣流入五帝座

癸丑上御秦天門顧侍臣曰有言朕法令大寬者夫治人
如醫有是疾則服是藥不及傷矣朕守成之日正不敢傷民
之時無疾服藥朕不為也

設遷曰草除之初鷹鷂成風或戍或誅家漂戶昧舊臣宿
士恫疑沮喪殆無穴自避而猶以法令大寬動英主之聽



豈非陳瑛紀綱革欲斤斧斷斬天下進其瞽說乎
夜大星青白光自紫微西藩行至北平杓
甲寅夜大星赤光自河鼓行入近濁
乙卯勅鎮守永平山海成安侯郭亮選三千騎勦十八盤賊
勅建昌府同知馮士成等二十六人曰爾等事統皇考舊
矣建文中罷斥為民亦有不當罪者朕思任舊人仍召爾至
方今官備爾且歸家念皆蒼顏皓首勿欲重勞特賜冠帶仍
爾故職歸尚撫爾子孫率化爾鄉人子弟曰賜道里費有差
日本國王源道義入貢

山西蝗遣捕之


丙辰勅寧夏總兵官左都督何福曰朕委爾鎮守度事合宜
即行之勿人言自疑時有讒福者

緬甸頭目那羅塔入貢詎木邦孟養阻道乞賜職印從之設
緬甸宣慰使司

夜大星流三尺餘青白光燭地自參宿流至天園

丁巳遣內官尹慶等詔諭滿刺加柯枝諸國

戊午通事鎖飛自迤西還初鎖飛同鎮撫合哈帖木兒使迤
西時鬼力赤阿魯台擊瓦剌馬哈木大敗之鎖飛等被留鎖



飛夜竊其馬脫歸

夜大星光青赤自南河入柳宿

已未 上御奉天門命侍臣輯古嘉言善行有裨君道者以

授皇長子諭曰朕少寓鳳陽時民間細事無不究知受命北

平經絕塞冒霜雪與士卒同甘苦身未所歷則博考載籍覽

鏡昔人之言行今長子居守北平雖吏案奏牘亦令躬閱以

知為臣之難他日可為君也

賞北京守城官刑部左侍郎李友直等金幣有差

辛酉戶部尚書郁新等言湖廣夏稅踰期布政司守令俱可

罪 上曰賦入有經制耕獲有先後道里有遠近其勿問另

限之

甲子慶成王濟炫來朝

勅晉府長史龍鐔等曰古人臣無私交王府與西番往來以


私車遞送王年少不知古長史儒者謂不知乎廷臣欲朕法

爾朕姑不問尚慎戒之

夜大星光青白自右旗入西市東垣至侯星旁

乙丑兵科給事中言天下衛所官吏上籍或額數盈胸或姓

名舛異或不印或不臣或不年月皆不敬當罪之 上曰一



人之精神有限案籍勞繁或短于計數或成于迫促姑條詰之更令詳進

夜大星赤光自奎宿入壁後有二小星隨之

丙寅治福建巡海指揮李彛罪追卹福州中衛百戶孫瑛等

瑛擊海寇死彛不之援且冒功

戊辰命脩祖陵易蓋黃瓦

庚午浚江都瓜洲等處河堤

辛未江南高郵州判官李憲為監察御史監生張逢為科

給事中

夜金星入底氐宿

壬申靖安侯王忠鎮北京屯田

癸酉高平縣吏告知縣斂民財市馬給遞送大理寺臣言方

禁斂財宜抵罪上曰禁令不許為私也馬給遞送公事矣


釋復職

夜大星光青白燭地自土司空旁行至近濁

甲戌西洋刺泥國回回哈只馬哈沒奇刺泥等入貢附載胡

椒當稅上以慕義免之

夜火星犯壘壁陣東五星旁有二星隨之



十一月乙亥朝鮮入貢頒大統歷并賜朝鮮諸番國著為令

丙子或訐寧王權誹謗魔鎮事 上謂必出細人再逮之不

發遂賜寧王書兄弟同氣近事悉不問第用小人必害國家
更不必蔽

丁丑錦衣衛奏死罪一 上審其情宥之戍于興州曰諭刑
部曰朕矜其悞人無不可與自新之路且國家得一人耕亦
可食數人其為例

夜大星出華蓋行入紫微東蕃內

巳卯四川行都司奏越鴛衛地番寇時掠宜起兵勦捕之

上曰令嚴備仍遣撫諭之若不遵當率師滅之

庚辰右軍都督僉事陳俊等運淮揚倉粟百五十七萬六千

二百石有奇赴陽武轉輸北京

癸未命浙江都指揮僉事程鵬率兵防倭于寧波


夜大星光青白燭地自幸臣旁行至游氣中

丙戌夜金星犯鍵閉

丁亥定給驛例

巳丑晉恭王第六子濟煥來朝

辛卯勅兀良哈部落曰朕設泰寧福餘朵顏三衛俾爾統衆



鎮邊舊嘗授官者以聞其頭目等當授官者朕即授之俾世
居土樂業三衛歲二貢每貢三百人

壬辰初洪武中免應天等五府民春夏二稅每歲隙籍其丁
之壯者供役及是內河淤塞皆來浚 上閱其寒賜鈔罷歸

令京軍次第成之仍賜鈔充僱直

甲午前郢府典儀副張益為刑科給事中

市哈密馬四千七百四十匹先是許其入馬

夜順天地震

乙未 上諭右順門諭六科都給事中朱元貞等曰天下疾


苦朕恐爾曹未之悉也選郡縣考滿官假六科辦事隨爾等
在朕左右有問即對有言即達乃至今竟無一人言之者夫
郡邑之大無一事若耶在朕左右而尚默 况遠千里退其
申諭以朕意

丙申廣西總兵官都督同知韓觀等平柳州山賊斬千一百
八十餘級俘五十一人

四川都指揮使胡淵有罪免

丁酉夜月犯太微東垣上相星

己亥封濟煥永和王



勅山西右布政使周璟曰爾擢官未暮聲稱綽著慎終如始
尚敬懋哉

燕府紀善陳勝謙為禮科給事中引禮舍人趙從吉教諭申
維岳為監察御史復曾寶為鄱陽知縣劉子敏監察御史
河南儀封知縣許譽秩滿至京縣民詣闕乞留從之賜鈔綺
辛丑監生陳聰為戶科給事中

女直野人頭目阿哈出等來朝設建州衛軍民指揮使司
閏十一月甲辰朔兵部主事年論上言臣往廣西撫諭桂林諸
洞蠻皆已歸化第猛獍時險出沒不時兵至則匿兵退則出

官軍遠入觸瘴多疾惟土兵諳其地情可責收效今後宜合
官軍協擊彼慕利爭先或可免轉運損伍之患 上從之

乙巳靖江王府贊儀之國桂林


丁未巡按河南監察御史孔復招流民三十萬二千二百三
十戶墾田十四萬七千二百五十八頃

癸丑免鳳陽淮安徐州今年田租之半

甲寅上林知縣夏禮為廣東道監察御史

乙卯兵科都給事中鄭遂奏對失措謫沅州同知

戊午行人楊渤還自安南以國人表與胡奎表合 上從之



庚申 上御奉天門諭左都御史陳瑛等曰國家設按察司
糾察牧守無所不得問無所不得言也河南蝗旱數歲水為
民災有司不撫字甚者腹削之按察司官不一言其移檄切
責俾來察所部軍民利病及布政司官令賢否以聞并檄各
按察司及按治御史之在外者

辛酉賞福建金門千戶所千戶王斌巡檢解廸追捕海寇功
進斌永寧衛指揮同知廸所鎮撫

癸亥 皇長孫至自北京

甲子 上謂侍臣曰朕每當法司奏囚未嘗不反覆思究之


也毫有可生便從寬減蓋往在軍中未嘗輕僇一人况今為
天下主哉

浚山西平遙縣廣濟渠

丙寅賞從征哨騎功

南陽知縣言逃民難以賦役乞下令嚴捕之 上顧戶部尚
書郁新等曰民誰樂去其故鄉哉今河南連歲水旱蝗螟守
令鮮撫字之夫其田廬生業已廢棄捕歸益之困耳
太醫院使戴原禮致仕

丁卯禮部郎中夏止善等往封胡查安南國王



寧夏總兵官左都督何福奏龍禿魯灰等住不老山議入
寇惟鬼的哥以資糧不給不從上知其謫若不出槍桿野
狐二嶺雲州之地必向山西大同勅北京山西為備勅未下
山西奏犯灰溝村黃甫川如上所料
夜有大星如斗光蒼白燭地出中天雲中行陰、有聲流三
尺餘至雲中

辛未上御奉天門顧侍臣曰北京山西寧夏一時地震朕
心惕然爾言其故對曰兵戈土木應也上曰比年兵旅飢
饉民困甚矣朕夙夜圖之朕避暑樓居武門端門而已後宮

塾隘不敢增脩慮土木也若云兵戈政當飭邊脩脩

癸酉山東男子獻陣圖斥之

都督張文傑縱其子銘犯法劾免


十二月甲戌朔翰林院侍讀學士解縉等脩古今列女傳成

上序之賜縉及侍讀黃淮胡廣胡儼侍講楊榮金幼孜楊士
奇檢討王洪蔣驥典籍沈度文綺衣各一襲鈔有差

丁丑免邊衛屯官赴京孝覈

福建俘海寇至京法當死上宥之戍邊


己卯復營州右屯衛



庚辰長清知縣王文貴湘潭縣丞馬榮宗延安府照磨方仕
隆鳳縣典史馮惠武昌縣丞沈斯賀縣主簿李守忠慶陽教
授耿通監生郭瑄畢進華禎王生沈昊張麟熊觀薛魯前燕
府長史司吏楊勉俱為給事中日照李縣李綜為監察御史
辛巳置兀者衛女直野人
癸未封贈靖難公侯伯三代及妻如舊制
初國朝諸司職掌云嫡母在所生之母不得封嫡母亡得並
封又武官嫡繼母在所生庶母不封嫡繼母亡所生母在宜
如其子職封繼母見在嫡母已亡合封繼母追贈嫡母嫡母

及所生母俱亡止贈嫡母時廣平侯袁容嫡母孫生母劉俱
亡獨繼母羅在而封贈例不一禮部翰林院議之曰若生命
母繼母俱在禮難並封今繼母在當封所生母并嫡母俱亡
亦可追贈從之仍不為例

甲申勅讓鎮守遼東保定侯蓋善曰爾比遣百戶傅漢出塞
竊馬以致喪失內失可用之人外失信于夷狄遼東地腴一
年耕足數年之食海運可省爾不盡心屯務軍士皮裘必先
給爾及今方言有司展轉文移豈浹旬可得及皮裘至天氣
向暖苦寒之地下人何堪為帥如此國亦何賴



乙酉前燕府典儀正陸永成為鴻臚寺右寺丞行人司正黃
宗載為湖廣按察司僉事杭州教授蔣良輔為戶科給事中
賑棗強縣旱饑

丁亥諭吏部都察院曰為國牧民莫切守令其令巡按御史
及按察司凡守令到任半載以上以賢否貪廉之實奏

戊子夜月食

己丑夜木星犯羅堰下星

壬辰 上諭御謹身殿閱 太祖制集顧學士解縉等曰建
文燔宮 皇考遺翰盡矣朕深悼痛有散落臣民家者乎遺


書各王府遣監生分詣天下購賚之

免陳州今年災租

癸巳夜大星青白光自紫微垣行至游氣一小星隨之

乙未楚世子孟燒煖來朝

貢士王偁為翰林院簡討 上更問吏部簡討下何官曰博
士典籍侍書詔待曰皆已除未對曰已除曰賢何如偁對曰
舊博士中皆老成文學士偁初除未知 上嘆曰國家用人
以賢以勞偁賢既未知勞亦未有乃令賢有勞者位其下其
自博士以來陞秩皆與偁同于是博士張伯穎王汝玉典籍



沈度潘畿侍書蘇伯厚待詔王延齡劉宗平解榮俱進簡討
丁酉江西進賢縣稅課局大使唐簡為工科給事中太平府
訓導王子沂嘉定知縣樊鎮為監察御史
戊戌命戶部尚書郁新錄奏民間利病
庚子陝西甘州山丹二衛獻瑞麥肅州衛獻嘉禾
辛丑安南國王胡奩入貢且上章謝咎時封命未至

國權


西夏知西涼府王默與風使女監官設遷孺木著


永樂二年甲申

正月癸卯朔夜大星青白光自雲中行至近濁

甲辰勅曰今春時和東作方興天下文武諸司各宜申明教
術勸課農桑慎固守封問疾苦恤飢寒黽勉誠心崇寬厚政
已已復命戶部尚書夏原吉治水蘇松時入朝言水通海道
舊河港未盡治遂復往大理寺少卿袁復副之
右軍都督僉事陳俊從祀太廟失儀下錦衣獄

國權 永樂二年





丁未復遣監生劉源等三十二人分訪各郡縣購 太祖宸

翰 戊申脩江南高郵湖隄

庚戌道士獻道經斥之

辛亥詔近年兵器遺民間者悉送官

宣府備禦武城侯王聰同安侯火真以千騎巡迤北申即

五戶部右侍郎李文郁失廟祀下獄戍三萬衛

乙卯平上南郊

丙辰陝西按察副使王煜娶屬吏女被劾逮下獄

丁未夜月犯軒轅左星

丁亥勅占城國王占巴的賴以安南胡查服罪不服侵越爾

宜輯睦自保

定屯田賞罰制

戊午詔自今有犯交易銀兩之禁者全家屯戍興州

庚申諭守城功前燕府紀善李達袁圭吳牧相佐王克敬王

安王弁李能何順甄寶前監察御史柯榮等俱為給事中

寧國府訓導陳仲完為翰林院編修

辛酉禁民下海時閩人私市外國致寇

夜大星出梗河青白色流三尺許倍大入于天紀

癸亥山雲襲金吾左衛指揮使中軍都督僉事山青之子

戊辰翰林院侍讀學士解縉侍講讀黃淮主禮闈

巳巳駙馬都尉永春侯王寧隆平侯張信賚璽書召王世子

及郡王高煦赴京

戶部尚書郁新言河南都指揮劉英上屯數不足供半歲宜

罪上以始令宥之召英等諭曰屯田重務爾輩糜祿欲役

疲民以贍惰卒大非策矣後不爾貸也

庚午鴻臚寺卿楊砥為禮部右侍郎徐州判官晏璧為山東

按察僉事

戶部左侍郎孫瑜坐事降北京行太僕寺少卿

辛未徵署山西都司事都督僉事曾遠都指揮使房昭下獄

以擅罪軍職也

夜大星赤光自天市西垣南入天江


二月壬申朔蜀世子悅燦來朝

勅江西總兵官襄城伯李濬等選壯卒三千人往勦永新縣

賊毋濫及

癸酉置奴兒千衛女直野人

禮部引奏北方歲貢生入學十年下考者當充吏上曰人



心志舒泰衣食溫飽始進于學北方頃年苦兵餉故業荒其
還學補十年後試之

乙亥江西按察使周觀有罪謫河間駟卒

丙子復紀諄監察御史建文中謫睢寧知縣

命豐城侯李彬以卒騎二千助勦永新縣賊

丁丑母連河等處朝使辭歸上召使者前勞之問田獵生

事久而退顧侍臣曰彼萬里來朝不稍垂顧問必不附歡侍

臣曰陛下懷柔亦至矣第問其田獵未及人民畜產何也

上曰田獵是其性俗若問人民畜產彼或心疑朕方懷遠故

不及也

戊寅禁小秤交易大理寺得犯者請論違制律上問工部

明禁否對曰文移諸司矣曰榜示否對曰未上曰未榜市

其宥之


夜大星青白光出柳宿行入星宿

庚辰增靖州衛中右中中前中後前五千戶所

辛巳開捷為縣并監

壬午安徽涇縣丞孫述密縣丞程竑孟縣丞李維亨偃師縣

丞孫英孟津縣丞李達新安縣丞裴榮臨漳縣丞韓肆宜陽



縣丞梁資青城縣丞周志繁時主簿費賓靜樂主簿王順等
俱為給事中象山縣丞張翥為監察御史

乙酉禮部請定闈額 上問其舊尚書李至剛曰各科多或

四百七十餘人少則三十人 上曰朕初年且多之不為例

得楊相第一相洪武二十七年乙榜例教官時年十六父思

貽言未堪人師俾歸教之後仍入太學

設北京兵馬指揮使

丙戌設兀者左衛時兀者衛顯目脫哈等來朝上問兀者

丁亥雲南布政司左叅政張定有罪謫德州驛卒

三庚子夜大星光赤黃出天津行至近濁

已丑永新賊平止李彬兵勿進

刑科奏強盜論死有年十五以下者二人 上曰老悼不刑

二免去悼不遠其勿論


庚寅內官楊真童等往賜益定木邦土官綵幣

壬辰琉球國中山王世子武寧以中山王察度喪告命遣祭

封武寧琉球國中山王

甲午前軍都督府言龍驤衛千戶妻無子妾之子代職居嘗

見惡于妻以刃傷子足妾訟其欲殺子請並治之 上曰



妻傷子足恐無殺意使其母子嫡妾兩造獄吏之前非風化也付夫自治

乙未山西徐溝知縣王進為四川道監察御史

脩國子監經籍板

夜大星赤光自紫微閣闔門外行入北斗杓二小星隨之

已亥築江南寶應縣泥光白馬二湖隄

庚子工科都給事中趙毅為工部左侍郎

夜大星青白光燭地出雲中

三月壬寅策貢士楊相等四百七十二人于奉天殿賜曾榮周

述周孟簡等進士及第出身有差

甲辰內官張勤等往賜麓川緬甸孟養土官綵幣入在二十

丙午江西湖口知縣石魯為陝西道監察御史

丁未選翰林院庶吉士楊相宋子環王訓王直秦正學徐安


胡紳彭汝器周忱劉子欽周文李寧張徹章朴歐陽俊盧翰

梁任熊直王道曹景暉陸孟良蕭省身劉孟鐸柴廣敬張宗

璉田忠曾與賢洪鍾洪順余學夔陳滿蕭清劉紹林鳳張憲

殷昂嚴光祖涂順段珉李貞江鉞章敞倪維哲許瑤陳敬宗


王仲壽李迪袁添祿李時勉楊繁並習文湯流王英孫奉余



鼎李永年袁邇周遠鍾旭彭禮戴弘演並習書戶部辦事進士當塗李衡以年少自請命改庶吉士同江寧楊勉習書焉姚士彝曰國朝隆禮鼎甲賜第後即官翰林若考選使讀中秘書自永樂二年甲申科始名為制科得與選多由禁近人皆榮之然亦有遇有不遇如永樂丙戌壬辰乙未辛丑甲辰五科合庶吉士九百二十三人曾無一人官內三品者至成化丁未二十三人與鼎甲得五相十卿而得謚者十二人惟邢侍汪儀不得謚耳若隆慶戊辰人亦二十有三而內閣七人登卿事者十有七人數前後相若貴盛

大過之更可怪者嘉靖壬戌一甲三人皆入閣正德辛巳一甲三人皆為外官何榮否不相及者若此有如世廟丙戌己丑館選合四十人俱照賜第出身選格以部科中行州縣散館此羅峰公作用也惟正統戊辰浙無一人最為短氣蓋自永樂考選至今日庶常極多者永樂己未六十人極少則正德戊辰五人而已

庚戌吏部奏有千戶奏薦士武人也朝命不及請坐違制罪上曰不及命慮其昧知人能薦忠心也試而果才即應授官刑部奏方禁銀交易江夏民有父死以銀買塋具上曰禁



銀交易恐鈔輕耳詩曰凡民有喪匍匐救之其赦勿治
辛亥夜大星赤光自天市西垣行至近濁沒有一小星隨之
丁酉雲南都指揮使曹隆為後軍都督同知
己未琉球國山北王攀安知入貢
庚申 上諭刑科都給事中楊恭等曰朕命御史給事中撫
安中外要以禁止奸慝道為善而已昨給事中丁玟至四川
見無犯者乃陰遣親信用銀誘民交易已則執之昔唐太宗
以物試人待其受之則加之罪賴魏徵諫止古人以光明正
大治天下苟則不堪偽則不信脫小民畏法反執陰誘者于

官曷用治之都察院其執玟論罪

翰林院編修王達為侍讀學士

辛酉大理寺左少卿呂震為寺卿右丞寺吳中為左少卿

壬戌壬知縣何廣任壇田本宋北主簿古彥輝鄧宗文


布政司都事呂彥機 衛經歷羅仲穎 府知事王順

舉監生李矩周正秦瓚魏清文振許信闕和呂衡楊祥楊儼

任王理陸必壽王良俱為監察御史

上晚御右順門召後軍都督府及兵部官皆不在列御史劾

奏 上曰朕命之矣有司早朝奏事無者治事署屏中不在



列必無其可奏也

甲子諭六科給事中曰爾職居近侍比不聞一言軍民利病何也君資臣成治臣不輔法是不忠可退思之條析以聞

遼東都指揮同知何琪失機論死

乙丑世子及郡王高煦至京師

丙寅安定衛指揮朵兒只束等來朝請納馬五百給布絹後

仍予茶

戊辰敷惠王允熾改封甌寧王世祀懿文皇太子

己巳諭六科都給事中馬麟等曰爾等疏駁奏牘一字之悞

皆喋喋毛疵甚矣文書委積人精力偶敝自今奏內數日月

日等錯謬令旁注印蓋之不必以聞麟等曰有不稱臣者

上曰下豈敢慢上或猝遽漏書亦旁增之爾等在朕左右凡

天下何弊當草何利當興何所軍民未安何人奸邪未去當


歷舉以言如此細故可略也

庚午上御武英殿語侍臣曰人君進退人皆須服衆若進

一人而皆其善則誰不為善退一人而皆知其惡則誰敢


為惡非然者私愛私惡何以服天下

四月辛未朔勅曰朕惟天下武臣犯石矢冒霜雪累積功勤致



有爵位或承祖父往有犯刑朕不忍遽絕其世皆謫之遠方
今已踰歲其令輕者復職重者立功自贖
遣指揮完者秃那海百戶亦刺斯等勅諭瓦刺馬哈木等賜
文綺并諭和林等頭目
簡東宮官屬淇國公邱福兼太子太師成國公朱能兼太子
太傅吏部尚書蹇義詹事府工部右侍郎金忠為兵部尚書
俱兼詹事兵部右侍郎墨麟工部左侍郎趙毅俱兼少詹事
吏科都給事中朱原真刑科都給事中陸善俱為詹事府丞
壬申僧錄司左善世道行為太子少師復姚姓賜名廣孝

禮部尚書李至剛兼左春坊大學士翰林院侍讀學士解縉
為學士兼右春坊大學士侍讀黃淮胡廣為左右庶子胡儼
為左諭德皆仍兼侍讀侍講楊榮為右諭德仍兼侍講楊士
奇兼左春坊左中允北京行部主事尹昌隆為左中允脩撰
李賢為右中允仍兼脩撰吏部左侍郎許斯溫兼左贊善編
修陳仲完為左贊善仍兼編修檢討王汝玉為右贊善仍兼
檢討國子博士徐善述監察御史王子沂為左司直郎國子
助教晁鎮刑科給事中王文貴為右司直郎刑部司務楊正
國子博士楊斌為左右清紀郎教授程禧教諭黃贊為左司




諫教諭張祥梁良為右司諫編脩楊溥中書舍人姚友直為
司經局洗馬楊溥仍兼編修給事中吳牧兼校書吏科戶科
給事中梁質兼正字教諭劉真為校書訓導王雅為正字
禮部郎中汪原進工部主事程石琮為漢府左右善史兵部
郎中顧晟工部員外郎盧盛為趙府左右長史
癸酉行部郎中北京李繼鼎改禮部儀制司郎中兼右贊善
廣西思明知府黃廣成上言乞勅諭南安國王還祿州西平
州永平寨侵地許之
進士李衛自訟其父洪武中受法不當違令干進上曰古

人殛鯨興禹朕不爾罪爾其勉之
甲戌立王世子高熾為皇太子封漢王高煦趙王高燧詔天
下封楚府孟熾崇陽王孟燾通山王孟燦通城王孟炤景陵
王孟燿岳陽王蜀府悅燿華陽王悅燿宗寧王悅炘宗慶王
悅炘保寧王代府遜熾為世子遜熾廣靈王遼府貴烜長陽
王貴燮遠安王貴燮興山王貴煊巴東王貴炘潛江王貴燿
宜都王貴炘松滋王寧府磐斌岷府徽煊俱世子徽燦鎮南
王谷府賦灼世子賦燿醴陵王韓府冲燦世子冲燦襄陵王
冲燦臨汾王晉府美圭世子初上靖內難謂次子高煦武

國權


永樂二年

上



健使從師領勅騎接戰白溝東昌有功及浦子口上戰卻
高煦搏胡騎力戰敗盛庸故甚愛之及即位密召邱福王寧
學士解縉等議儲福寧曰二殿下功高于世子立子以長平
世之道也縉頓首曰以臣所見異是夫世子忠敬仁孝天下
莫不聞異時守成令主也且夫奪長為亂道侍郎金忠庶子
黃淮主事尹昌隆各正對上猶持之久乃定冊太子曰咨
爾朕之嫡長朕藩于燕爾為世子聰明純厚孝友溫恭朕平
內艱爾功居守事上恤下至仁小心茲授爾冊寶命爾為皇
太子爾惟夙夜祇承為善無間一念過虧大德之累爾宜念

之學勿至迂明勿至察嚴勿至猛寬勿至縱謙卑遜志容受
忠良勤儉安詳惠鮮衆庶以承宗廟以保社稷爾其敬遵之
設遷曰唐臨淄王隆基誅帝氏兄宋王感器曰時平則先
嫡長世亂則遷有功當時趨之靖難之初漢庶人血戰陷
堅諸將屬心浦口之役文皇帝以神器相藉重此何異
秦王世民哉然仁廟守北平亦不遺餘力脫根本之地少
生墮尺寸雖百庶人亦何能為此以程之固不當以建成
事例世子也其後文皇帝迫于讜論割私愛以全震索
家法嚴矣亦猶浸尋踰歲爰開鶴禁豈非嫡長天定巧力



俱無所撓乎

丁丑諭三法司出淹獄

寶慶知府儀智為通政使司右通政兼右春坊右中允

前浙江布政使司右叅政趙玘使安南還進刑部右侍郎

庚辰封志均渭南王

命戶部尚書太康王鈿仍浙江左布政使致仕鈿洪武中舉

秀才授禮部主事改長沙通判免復舉明經授北平通判試

吏部郎中遷福建左叅議至左叅政使百夷郤驢進浙江左

布政建文中拜尚書上即位解印給半祿後撫北京山東

告老有文學雖廉靜而脂膏遇大議無所可否云

監生湯銘游顏為刑科給事中

壬午封汪應祖琉球國山南王應祖故山西王承察度從弟

攝國事歲貢

癸未麓川平緬宣慰司各入貢訐孟養木邦數見侵命西平

侯遣諭之

甲申文華寶鑑成初命儒臣輯古嘉言善行至是御奉天門


召皇太子面授之其書視太祖嗣君昭鑒錄加廣益以

太祖寶訓

國權

永樂二年

十三



有官軍採木安慶凌脅民貲誣其誹謗縛送刑部獄上 上
曰諺恒言軍強民弱必軍誣民下府部訊實遂釋民抵官軍
罪并罪刑部官之枉民者

進士沈升孫子良李昌祺羅汝敬徐敬蕭寬褚讓獨孤樂善
陳士啟陳綱董鏞劉子敬陳伯恭陳資善趙曾趙濟劉剛尤
儀劉澄黃揚俱改庶吉士脩書

乙酉長山王賢煖來朝

免順天永平保定順民田租十九萬九千七百餘石

夜火星犯天罇西星

丙戌廣西柳州慶遠等叛蠻陳公宣等就撫


上朝罷諭六科給事中曰朕可否庶務或有失中爾等直言


顧解縉曰敢為之臣易求敢言之臣難得

戊子夜金火星同井

己丑勅文武群臣曰今天下雖安民未蘇息郡縣豪猾遇有
征繇並緣為奸細民不勝盜賊茲起爾等其悉心政務毋橫
斂一錢毋妄興一役稱朕閔念元之意

韃靼頭目脫兒火察為左軍都督僉事哈兒歹為都指揮同
知署朵顏衛事安出及土不中俱為都指揮僉事署福餘衛





事忽刺班為都指揮僉事署泰寧衛事時指揮蕭上都等使

兀良哈各頭目隨朝三百五十四人俱各授官有差

庚寅北京行部右侍郎劉翼南改禮部右侍郎

開四川資縣并益

壬辰前遷江知縣梁護服闋復浙江道監察御史

建文中降知縣

甲午更定天下衛所屯田守城軍士視地之夷險要僻臨邊

險要者守多于屯在內夷僻者屯多于守地雖險要運輸運

難至者屯亦多于守

夜大星青白光自翼宿行至游氣中

丁酉夜水星犯畢

己亥鄔陵知縣婁觀復福建道監察御史

建文初降知縣

設老撾軍民宣撫使司土官刀線歹為宣慰司使


是月倭十二艘犯浙江寧波穿山百戶馬興死之尋寇蘇松

五月辛丑朔國子監祭酒徐旭書奏不謹當降表上問吏部尚
書蹇義旭何如對曰文有學守寡合上然之改翰林脩撰
諸司辦事進士曾慎魏騏吳惇漆霄趙理趙玟韓庸史彬徐
觀樊靜曹彥昌陳旭田堉羅處富邢旭曾恕王完葉貞陳興
俞禮趙濬潘中徐吟胡秉彛周志義俞益曹睦楊儀鳳譚原
性俱能書選翰林院庶吉士
命北京百姓有犯應決者許收贖
夜金星犯鬼

壬寅豐城侯李彬率軍鎮廣東清遠伯王友為總兵官都指

國權 永樂二年

共



揮僉事郭義副之巡海

建昌府教授于敬為江西道監察御史復楊直浙江道監察

御史建文初出山東青州知府坐免

癸卯夜水星犯六諸王西星

甲辰禮部以琉球山南王貢使市處州磁器當罪上以懷

遠不問

乙巳設散毛施南二長官司隸大田軍民千戶所初元時各

置宣慰司洪武六年改宣撫司又設龍潭安撫司隸散毛二

十三年廢設大田所至是土官子覃友諒等奏復之降長官

司友諒為散毛長官田應虎副之覃添福為施南長官覃敬

副之

丙午夜有大星如斗赤光出雲中

丁未夜大星赤光燭地出自北斗魁行入文昌中


戊申通政司右通政兼右春坊右中允儀智為湖廣右布政

使應天府丞王公亮為四川右布政使安仁典史素李為山

西道監察御史

庚戌上親詣孝陵先日錦衣衛請具法駕命祇數騎前導

上顧侍臣曰 皇考忌辰方屬感慕之時自非辟道導騎亦



可省也

辛庚貢士莫福為刑科給事中

壬子戶部右侍郎劉觀改都察院右副都御史

甲寅右軍都督僉事臨淮景福卒福洪武征戰累有功授會
州衛指揮同知

乙卯監生朱政黃理柴震俱為兵科給事中西安府經歷黃
友信為陝西道監察御史

設廣西憑祥縣時憑祥巡檢司土巡檢李昇言地瀕安南人
庶遂改縣即以李昇為知縣

己未復沈源為廣東監察御史源建文中降福清知縣

庶吉士杜斂黃惟正郎慶為戶科給事中周玉羅亨信張侗

監生胡昌為工科給事中

壬戌夜有大星青白光燭地自危宿流至雲中沒


丙寅庶吉士林正魏暹喻則成白瑜鄭蘭進士封孜袒趙登


監生陶瑞陳貞裴川為給事中

丁卯興安伯徐祥卒祥大冶縣人燕山右護衛千戶從靖難

視諸將中為最年高能勤慎出征有功年七十有三

戊辰築安徽當塗縣慈湖決隄并視浙江江西湖廣安慶蘇





州松江等圮脩築

己巳設八百者乃八百大甸二軍民宣慰使司土酋刀招你為八百者乃宣慰使弟刀招散為八百大甸宣慰使

庚午遣官巡視瀏陽益陽安鄉華容龍陽武陵石首監利江陵各等縣水災

六月辛未楚世子孟烷來朝

勅招臨邊逃將復職逃卒復伍逃民復業

癸酉木邦益養二府改軍民宣慰使司知府罕的法刀木旦為宣慰使世襲

脩河南孟津河隄

甲戌復王敏為北京道監察御史敏建文初坐事降為浙江太平縣典史

夜有大星青白光燭地自雲中流入天舡

丙子桂東典史李輅唐縣典史劉冕為監察御史復易忠監察御史忠建文中降內江知縣

戊寅夜大星青白光燭地自七公行至近濁

庚辰許警報給驛

乙酉夜月食

丁亥命吏科給事中曹崇誥吏部汰冗官

復陳珪監察御史珪建文中坐事降河南湘鄉知縣

誅鴻臚寺右少卿汪泰泰使朝鮮國私受餽又通權貴

戊子公侯駙馬伯儀賓祿俱米鈔兼支自明年為始惟二百

石以下者全米

庚寅陝西按察副使宋性為布政司右叅政從戶部尚書夏

原吉往蘇松治水

辛卯朝鮮國王李芳遠奉命進牛萬頭每牛酬絹一疋布四

疋俱給遼東屯卒

蘇松嘉湖等府大水民饑遣監察御史高以正等賑之

夜大星青白光出壘壁陣流入羽林軍

甲午諭禮部曰天下之才不盡也下第貢士或宿學偶劣或

考官失之其再試既試得張鉉等六十人召見賜冠冕而免


之俾肄國子監

封哈密安克帖木兒忠順王其兄忽納失里元封威武王也

改封肅王卒安克帖木兒嗣至是入貢請賜爵給金印

乙未命太子少師姚廣孝賑蘇湖二府廣孝至吳侯故人王

賓者三不出乃屏騎從步叩其門賓不應遙語之曰和尚錯



耶漸遠歸謁其姊亦揮出之廣孝于是披袈裟往猶弗見
家人強乃出捫其頂曰幸此尚存耳遂不復再見也

勅諭捕倭總兵官清遠伯王友副總兵都指揮僉事郭義以

大謝桃渚赤坎寨胡家港之縱掠宜自贖務出萬金

是月封景昌為定國公世祿二千五百石

七月庚子朔辛丑置四川建昌衛之普濟昌州威龍三長官司

貴州新添衛之丹平丹行二長官司

夜大星青白光出十二諸國行至近濁

甲辰雲南寧晉進士張為禮乞就教特除雲南府教授以勸

丁未周王楠進嘉禾

夜大星青白光自天淵行至游氣中

己酉復康慶四川道監察御史慶建文中坐事降為吏

夜金星八角

庚戌都指揮呂毅為副總兵官同王友巡海


壬子鑄平夷將軍印

慶成郡主薨蒙城王女適鎮國上將軍淮安衛指揮使黃琛

夜大星黃赤光出貫索行至游氣中

癸丑沁源知縣甄孝思巴縣典史孟憲高安典史何晏黔陽

國權 永樂二年 主



典史傅禮登州衛經歷洪秉俱為監察御史

甲寅寧世子磐斌來朝

刑部尚書鄭賜等劾曹國公李景隆藏亡命蔣阿演等二十
八人有異謀 上勿問止徵匿奴

乙卯太子太師曹國公李景隆及第都督增枝再被劾命鞫
蔣阿演等

丙辰 知縣李斌為禮科給事主

科臣再劾李景隆不軌劾景隆以曹國公歸第絕朝請
遣視三河順義東安香河水災

丁巳右軍都督僉事馬榮航海餽運北京


夜大星青白光自十二諸國行至游氣中沒

庚申臨清進野蚕絲群臣請賀不許

辛酉勅甘肅總兵官左都督宋晟曰近聞 乜孫台阿魯台
馬兒哈咱各懷異見去年大敗瓦剌今春瓦剌亦敗鬼力赤
又鬼力赤部落北徙彼詐難信爾給諸屯米麩多釀酒如寇
至毒酒及河井彼饑渴易斃也

勅宣府備禦武城侯王聰同安侯火真巡開平

禮部請賀山東野蚕絲 上曰使山東盡蠶亦僅被一方其



已之

壬戌鄱陽朱季友進書抵牾朱儒禮部尚書李至剛翰林學士解縉等請罪之命斥還里杖之百搜所著燔焉禁其教授生徒

設謫曰先朝守宋儒遺書如矩矱毋敢踰尺寸故懲朱季友而經學至深邃也句沿字踵等于首蠟于是曲士鑿其隅見稍有所緣飾而矯異實之紛互出如近日李贄獄死紙更為貴俗尚之躋久矣彼季友一斥不再振則當時功令可想見也

乙丑刑部右侍郎趙昉改工部右侍郎

丙寅遣監察御史郭林等賑湖廣江西火災

戊辰大理寺言有犯者法當黜上曰宥之人皆可自新墨


其身則心不復

已巳夜大星赤光燭地出雲中

八月庚午朔占城國入貢訐夏四月安南舟師見侵又掠朝賜

給冠服印信

壬申遣勅安南國王胡奩曰占城奏爾掠地剽人畜蕩廬舍又邀奪貢道備與冠服印章使臣屬甚非遵奉一統之義思



明府臣言爾奪其西平祿州永平寨此中國疆土也爾何得
擅取之不悛必討無赦

甲戌別失八里王沙迷查干入貢

乙亥安南故臣裴伯耆來告急曰臣事陳氏祖父皆執政大
夫女又親屬也臣故少得左右陳王既長為武節侯陳渴真
裨將統兵鎮東海洪武三十二年臣代渴真將而奸臣黎季
犛弑主篡位屠戮親賢滅族亡慮百數臣聞變勢不能抗棄
軍遁海島附番舶得至此兄弟妻子肉季犛之几久矣季犛
乃故經略使國老子世任膺心叨竊榮寵子蒼亦貴任也一

旦得志遂復陳宗擅易姓名曰胡一元子蒼曰胡奩偽號改
元大逆亡道 陛下念陳氏忠順之跡憫此無告遍施帛伐
臣得負弩前驅膏血草野以報陳氏足矣 上憫之給居食
戊寅封濟瓊寧化王

庚辰遣千戶高塔海帖木兒等勅諭澤州流民還三萬衛
辛巳免永平課鈔二年


壬午河南洛陽縣大雨雹傷稼壞民舍免田租

癸未曹景隆又被給事中劾 上曰朕自處之 國公李

甲申賑四川松潘衛饑

國權 永樂二年

十四



丙戌籍曹國公李景隆兄弟莊田佃僕入官

丁亥夜金星入房

戊子許民間暫以鈔中鹽福建山東廣東時鹽溢

己丑命廣西總兵官都督府韓觀招荔波縣洞徭編籍

庚寅武城侯王聰同安侯火真以二千五百騎巡迤北

許各省戶口食鹽各納鈔

免徐州睢寧今年田租

夜有大星光黃赤出卷舌流入造父

壬辰夜月犯鬼宿

癸巳清遠伯王友奏獲海寇命盡以鹵獲予鄉導嚴寶等

北京稔發鈔糶黍粟荳麥充餉

乙未駙馬都尉富陽侯李讓卒洪武中讓尚 上次女永平

公主靖難初協守北平故封閭奭平直好文下士年 追


封景國公謚

丙申勅寧夏總兵官左都督何福曰寧夏多屯 猝至恐先

受掠可于四五屯間探有水草者浚濠廣丈五尺深半之築

土城高二丈開八門使出入旁近屯 鎗重芻餉萃此無警則


耕牧有警則固守待援朕遙計其攻守之策爾自深籌之



丁酉老樞軍民宣慰使刀線歹遣使護前安南王孫陳天平
來朝言臣故王日烜裔孫也先王事朝廷甚謹傳至臣煇賊
臣黎季犛當國擅作威福臣煇稍裁之反刃相向而立其子
顯即日焜也無何更弑顯而立其子實尚在襁褓更弑之
自立其子倉為大虞皇帝臣先黜外僅得免他子孫近者誅
夷盡矣臣方欲集方恢復而季犛猝來撫倉皇出鋒鏑間道
抵老樞始得覩闕廷也夫興滅繼絕 陛下之大恩也陳氏
之遺燼得少熒者臣之大幸也 上引見賜居食
設遷曰海南諸夷莫勁于安南陳氏歷元明間八傳醞積

深厚非垂絲累卵之危盜相黎氏陰攘其位此時之百餘
年一旦移而據之倒囊出物而邊鄙不聳則陳氏之所培
者薄矣第陳天平裴伯者以覆亡之餘流離萬里致包胥
秦廷之哭俾狼毒狐魅几掩天日忽焉聲罪執簡褫其面
目豈敢正視事雖無濟為人臣子義不當如是耶噫國家
初造車書混一逾三十年名為懷遠 高皇帝示以不臣
毋勤遠略而逋裔奔隸仰之如天就之如日企踵待命所
謂王者無外豈以久近計之哉

夜大星赤光自天苑行至孫星旁有一小星隨之



九月己亥朔辛丑復大理寺左右評事

壬寅召巡海總兵官清遠伯王友等回京

韃靼知院馬刺沙率部落駐哈敦不刺遣使納款許之命鎮

守大同江陰侯吳高逆以兵

真臘國王參烈婆昆才入貢初中官使真臘有從卒三人遁

至是以國人補伍上歸之

左僉都御史王平以訊御史鄭中鬻獄事徇私見劾下獄釋

左都御史陳瑛等不問

福建布政使報暹羅通使琉球風漂其舟籍舟中物請命

上曰彼睦鄰也柰何日災而利之命治其舟給廩導之去

甲辰刑部艾郎中艾少岳禮科給事中何任讓為晉府左右

長官吏

乙巳遣國子監丞王俊用使朝鮮

丙午周王楠來朝獻騶虞群臣表賀

戊申大理寺左少卿吳中為都察院右都御史

己酉瓜哇國西王都馬板入貢


脩武涉縣河隄

庚戌晉王濟熺奏上護衛上不許曰皇祖賜也

國權

永樂二年

三



辛夷印烈女傳萬本給賜諸番

暹羅國王昭祿群膺咳諦刺入貢謝勅賜

壬子女直野人頭目鹿壇等三百七十五人來朝

乙卯曉刺大星見角宿

丁巳脩河南開封壞城

己未姚克勤為刑給事中洪武中主事謫役鹽場至是求仕

吏部尚書兼詹事蹇義等劾曹國公李景隆招納亡命陰謀

不軌上以既宥之姑勿論

庚申錦衣衛指揮同知潘胥等劾李景隆私闖人僭金龍服

器 上姑寘之

上御右順門召翰林學士解縉侍讀黃淮胡廣胡儼侍講楊

榮楊士奇金幼孜慰藉之賜五品公服命其婦入見 皇后

于柔儀殿賜如之


夜大星赤光出羽林軍西南方行二小星隨之

丙寅刑部郎中上言千戶某製夾皮鞭注桐油以決罰 上

杖而免之

丁卯左春坊左諭德兼翰林院侍讀胡儼為國子祭酒

令御史按察司課吏賢否其實跡以聞



徙山西太原平陽澤州潞安遼州沁州萬戶實北京

夜大星自軒轅東入平星二小星隨之

戊辰戶部尚書夏原吉浚蘇松下流訖工

十月己巳朔徙河南祥符漕運所避水患

庚午作信符金字紅牌給雲南諸夷其各土司量設經歷都

事吏目掌案牘

辛未凡者頭目那海又不札尼等來朝設兀者右衛後衛

故元丞相苦木子塔力尼等率所部來歸設肅州赤斤蒙古

千戶所塔力尼為千戶

定江西官田租折布民田輸米

壬申日本國王源道義入貢方物

御史摘甘肅總兵官左督都宋晟之擅 上曰大將受邊寄

可盡拘文法如彼書生言為哉遂勅晟曰御史言卿等專擅


此言官欲舉其職夫為將不專則功不立朕既付卿閫外事


有便宜即行而後聞自古明君任將率用此道

癸酉甘肅中衛指揮僉事王良失機誅于軍中

夜大星自紫微西蕃行至近濁

乙亥夜月犯壘壁陣西第二星





丁丑河南水溢

巳卯齊王樽來朝

四川巴縣典史沈熊為廣西道監察御史

減江南崑山縣荒租三千四百四十石有奇

瓜哇國東王字令達哈入貢給瓜哇國東王鍍金銀印一

庚辰鎮撫陸英以山後盜三十餘人乞徙民稍南五十里不

許命即捕之母致貽患

刑部尚書鄭賜言軍犯繫宥其初或容奸未便 上曰天不

于惡木廢發生君亦不于小人忘矜恤

辛巳夜大星自井宿行至近濁首廿零八人其日贈成金卷

壬午夜月犯畢宿

癸未木者托溫野人頭目喚弟等來朝設兀者托溫千戶所

甲申刑部尚書鄭賜都察院左都御史陳瑛等交劾長興侯

耿炳文衣服器皿僭飾龍鳳玉帶用丹鞞 上曰舊臣亦為

此乎其速改尋籍其家炳文自經 濠州人從父君用事 高皇帝起兵渡江時

朱國禎曰炳文事 太祖四十六年固守長興驅馳邊塞

有功無過保全終始任寄大約與郭武定英等此亦開創

君臣所絕少者留事建文北京既起拜大將軍率三十萬

衆一戰盡覆黃金開國功臣錄黃佐草除遺金皆言炳文
死于陣忠節錄二書收入祠中果爾其得死所成就一生
名節吾亦快之而國史則云永樂二年被劾縊死脩國史
者親與炳文相值目擊其事當必不悞一生功業在武定
之武定以椒房至親且非特將得免并獲贈謚耿獨鬱
至父子並死恐太祖在天之靈亦有所不安者也
設遷曰長興獲咎宿將急其身家易主詘膝卒之身死家
籍撥于初計殊非所望死望耳孰如君亡與亡之安也噫
九鼎重淪勳戚倖錄求其白首世寧凡人彼自覬瓦全者

鬼撲之見也

十夜大星出北斗魁行至近濁

乙酉蒲城河津黃河清

丁亥戶部言御馬監索白象穀不許責御馬監官奪民食欲

朕失天下心耶

己丑夜水星犯南北杓

壬辰夜大星自天廩行入天苑


癸巳駙馬都尉謝達卒

乙未琉球國中山王山南王入貢

國權

永樂二年

三



夜大星光燭地自畢宿行入五車

丙申勅勞寧夏甘肅總兵官左都督何福宋晟各鈔一萬錠
丁酉命刑部錄囚

戊戌刑部勅廣東儋州知州陳敏同海南衛千戶陳善等餉
舟風壞遽散之官軍當罪 上曰事有權宜並不及奏汲黯
所以達大體也置勿問

夜大赤星出北斗魁行至近濁

十一月己亥朔哈密忠順王安免帖木兒貢馬

都察院左都御史陳瑛等劾駙馬都尉梅殷蓄養亡命私匿


胡奴通女巫劉氏等罪命送胡奴于遼東


辛丑撫安湖廣給事中何海上三事曰理焚失舊冊曰軍衛
幕官選通文練事之人曰官軍年少選老成兼理佐 上悉
從之

廣東右布政使徐竒言本司委官遠役皆自贖贖今後乞
運所應赴又故道官遠多不能還鄉今後故官乞助歸其喪
以廣仁恩從之

濬江東門北河泊運舟

壬寅屯田額外餘糧悉與本軍自用仍給賞





癸卯中書舍人唐恕工科辦事官甘鏞賓州訓導歐陽謙盧

氏知縣賀潤高要知縣黃禎淄川知縣石魯並為監察御史

行人劉充為工科給事中邊信為湖廣道御史皆出使外國

開江南淮安清江浦閘

築江南泰興縣圩岸

甲辰上御奉天門錄囚釋放有差仍諭御寬者即以聞

周府汝南王有勳來朝上禮待之

江南江浦知罪周益坐罪行論婦梅氏言益母死請身代釋之

丙午夜大星流并宿

庚戌夜月犯天高西星

壬子富平縣丞陸具瞻為翰林院編修嘗事燕邸

夜火星犯鈎鈴上星

癸丑夜京師濟南地震

甲寅周世子有燬來朝

夜開封地震

乙卯山西介休縣民請採五色石製器黜之

丙辰工部侍郎趙毅謂鑿鎮江運河須九十八萬人上曰

年來民困輕其力植禍豈不殆哉寢之

丁巳翰林學士兼右春坊大學士解縉等進所纂韻錄賜名
文獻大成已謂其未備勅太子少師姚廣孝刑部侍郎劉季
篋及縉總之翰林學士王景侍讀學士王達國子祭酒胡儼
司經局洗馬楊溥儒士陳濟總裁侍講鄒輯脩撰王褒劉潛
吳溥李貫楊觀曾榮編修朱紘王洪蔣驥潘畿王偁蘇伯厚
張伯穎典籍梁用行庶吉士楊相左中允尹昌隆宗人府經
歷高得賜吏部郎中葉砥山東按察僉事晏璧副總裁餘簡
夙學之士纂脩焉
夜金星犯東咸

戊午蘇松杭嘉湖水災免今年租六十萬五千九百餘石
乙未設天津衛屯守直沽海運商舶建百萬倉

庚申進士張英為吏科給事中陳湯劉瑩為監察御史


丙寅廣西忻城訓導某以邑皆蠻獠子弟不就學詣闕自白
禮部欲罪之上謂其非苟祿下吏部調用

十二月庚午宣府諸屯堡成

辛未河南都指揮僉事劉珪過周邸門不下戍向武

癸酉進士吳廷用江貞虞貞王彥脩曹潤並為給事中

甲戌黃巖盜童養民等伏誅



丙子設天津左衛

戊寅 上聞中官私役工匠戒應天府尹向寶等裁之下中官錦衣衛

己卯遣

知縣潘隆勅諭瓊府黎峒土黎

夜月犯井宿

壬午許朝鮮國王李芳遠子禔為世子

乙酉徙南丹衛于上林縣

丙戌安南國王胡奎表賀正昌

庚寅禮部左侍郎宋禮為工部尚書右侍郎楊砥為左侍郎

工部右侍郎趙珣改禮部

壬辰韓城縣黃河縣清

安南使至今禮部出陳天平示之使者錯愕下拜至流涕裴

伯者以大義責之皆不能對命議其罪

甲午賜尚書侍郎金織文綺衣各一襲翰林學士兼右春坊

大學士解縉侍讀黃淮胡廣侍講楊榮楊士奇金幼孜如之

丙申御史顧謙等撫綏木邦等夷民

復各省郡縣歲貢生入國子監

丁酉夜大星自天市東垣北入天津

